

E di cuater Competencia di Obra y Arte recicla 2005 a keda inaugura na Biblioteca Nacional Oranjestad

E aña aki tin menos obheto, pero e calidad y creatividad ta hopi halto



ORANJESTAD - Cu asistencia di un grupo di invitadonan y miembronan di prensa Comite di Medio Ambiente di AHATA a inaugura e di cuater competencia di Obra di Arte Recicla 2005, ayera tardi na Biblioteca Nacional Oranjestad. Presidente di e comision menciona Astrid Muller a muestra su satisfaccion di por realisa un biaha mas e exposicion aki cu ta muestra e creatividdie participantenan di haci uzo di material recicla pa asina traha un obra di arte of un articulo di utilidad. Aunke e biaha aki e cantidad di obhetonan ta menos, tog e calidad y creatividad ta hopi halto; loke a existi cu e participantenan mester a dedica hopi tempo pa realisa

su obra. Tin cuater scol y cinco hotel, ademas di persona individual cu ta participando di e di cuater Competencia di Obra di Arte Recicla 2005. E exposicion aki ta habri na Biblioteca Nacional Oranjestad for di ayera te cu diabierna, ora cu den oranan di atardi henter comunidad ta invita tambe pa wak ken ta e ganadornan di e competencia di obranan y arte recicla organisa pa e Comite di Medio Ambiente di AHATA.

Exposicion aki ta habri diaranson y diabierna di 2'or atardi pa 7'or anochi; y nan lo bai tin dos mainta, diaranson y diabierna for di 10'or mainta pa 12'or di merdia. Y diamars cu diahuebs e orario lo ta di 2'or atardi pa 5'or atardi.

Otro siman e exposicion aki lo wordo muda na Biblioteca Nacional San Nicolas. Tur hende ta bon bini pa bin admira tur e obhetonan cu a wordo traha cu hopi creatividad. Segun sra. Muller esaki ta un bon oportunidad pa tur hende wak kico bo por haci cu articulonan cu enves di benta nan afo, bo por reusa nan. Den e cuatro añanan cu e exposicion y competencia di obra y arte recicla a wordo realisa, sra. Astrid Muller ta wak un adelanto hopi positivo, ya cu e hendenan ta mas conciente di loke ta pasa rond di nan, y cu nan por reusa y reduci hopi di e obheto cu por lo general ta wordo benta afo. Tur hende ta cordialmente invita pa bin presencia e exposicion aki.

